

# Yora Pavoro Isanquenatiniri Corosashisati

---

## Ivetsajeitari Pavoro corosashisati.

**1** <sup>1,2</sup> ¿Savicajeitatsimpi, corosashisati? ¿TecatSIMPA oyempine? Narotaque Pavoro sanquenatimpirori oca. Narotaque itiancane Quirishito, irootaque noquenquetsatantari: irootaque inintacaquenari Tasorensi. Nocarataqueri aca ayemisantaririnte Timoteo. Nosanquenajeitimpuro maaroni quemisantasanoitiriri Tasorensi ara pinampiqui: avirojeitaque noyemisantaririnte quemisantasanojeitiriri Quirishito. Nocoaque irineshinoncajeitempi Apa Tasorensi, aisati nocoaque cameetsa irisavicacaajeitempi.

## Ipasonquitacoventiri Pavoro corosashisati.

<sup>3</sup>Nocantani nocantapinitiri Tasorensi iramitacojeitempi, aisati nopasonquitapinitiri Tasorensi: yora iriri Avincatsarite Jesoquirishito. Avirojeitaque nopasonquitacoventiri. <sup>4</sup>Oshequi noquemacotaquempi, piquemisantasanoitiri Avincatsarite, aisati oshequi pinintasanojeitiri ayemisantaririnte. <sup>5</sup>Peerani piquemaqueroni ariorica pinquemisante, pavisacotaje. Queario oca piquemaquero. Aisati piojeitavaqueroni cameetsa irisavicacayempi Tasorensi anta inquitequi. <sup>6</sup>Oca piquemaquero ojatacayetanaque maaroni nampitsipeequi. Piquemantacarori avirori, piojeitavaquero queario ineshinoncajeitaquero Tasorensi. Ari piquemisantaquero, irootaque pipashinitantajari. Aisati iquempjeitaquempi pashinipee atiri, ipashinijeitaji iriori. <sup>7</sup>Tempa irio Epajarashi quenquetsatacainpiniri peerani. Iquempetaquena, icantani yantaveetiniri Quirishito. Cameetsa yantaveetiniri, irootaque notiancantacariri peerani iquenquetsatacainpi. <sup>8</sup>Icamantaquena piquemisantaquero Ishire Tasorensi, irootaque pinintasanojeitantacariri itsipapee atiri, <sup>9</sup>irosati nocantantacariri Tasorensi: “Pamitacojeiteri noyemisantaririnte anta Corosashiqui”.

**Icantiri Pavoro Tasorentsi: “Pamitacojeiteri quemisantajeitimpiri anta Corosashiqui”.**

Ari nocantani nocantapinitiri Tasorentsi: “Piotacayeri corosashisati maaroni picoacaqueriri”. Aisati nocantiri: “Nocoaque pintianqueneri Pishire oametasanojeiteri, iotacaasanojeiteri”. <sup>10</sup> Aisati nocantiri iramitacotempi cameetsa pisavique, piveshireacaasanojeitantareri, pimayetantearori cameetsayetatsiri. Tempa irio Avincatsarite, irootaque ocameetsatantari amajeiteneri oca. Aisati nocantiri iramitacotempi piotanteariri, aiqero pijatatiye. <sup>11</sup> Pashini aisati nocantiri irimatacantempirori: tempa irio Tasorentsisanori, icameetsatasanoti. Irimatacayempro pimatapinitantearori cameetsayetatsiri: eiro pishemarotsi, irointi pinquimoshireventero. <sup>12</sup> Aisati nocantiri Apa iramitacotempi pimpasonquitanteariri. Tempa yoameetsajeitaquee, ivetsicashireajeitaquee ajajeitantajeari anta icashiacaajeitaqueenta. Ancarajeitapaajeri maaroni ayemisantaririnte anta oquitaitetasanotinta catsini.

**Iquenquetsatacotaqueri Jesoquirishito.**

<sup>13</sup> Peerani oquempevetaca atimaveitani anta otsitenitananotinta: apincatsaveitarini camaari. Iro cantaincha yoavisacojeitajee Tasorentsi, irootaque apincatsatantajariri Itomi: yora inintasanotiri. <sup>14</sup> Icamimentajeitaquee arori, avavisacojeitantajari. Icavintsaasanojeitaquee, meeca eiro iquenqueshireacotajeerotsi caari cameetsatatsi antajeitini.

<sup>15</sup> Te inconijateji Tasorentsi, iro cantaincha iconijataque itomi, iquempetasanotacari. Peerani, irio jivatatsiri itimi irinti, tequerata ontimayete oca aneayetaqueri. <sup>16</sup> Tempa iriotaque vetsicajeitiriri maaroni: inquiresati, quipatsisati, conijayetatsiri, caari conijayetatsi, maaroni. Ari yovetsicajeitiri caari conijayetatsi: yora pincatsarijeitatsiri, jivatacaajeitantatsiri, savicacaajeitantatsiri, maaroni. Iriotaque Quirishito vetsicajeitiriri maaroni. Te irovetsicashiteariji, irointi yovetsicantari impincatsajeiteri iriori. <sup>17</sup> Iriotaque Quirishito intasanotacarori itimi, catsini. Icantiqueru maaroni yovetsicane: “Aitaque pincantajeiteari”. <sup>18</sup> Iro aito iotacairori avatsa maaroni. Eirome otimime, eiro aneime. Aisati iquempetaca Quirishito: ipincatsariventajeitaquee arori, aisati maaroni itsipapee quemisantiriri; eirome itimime, eiro ayojeitirime Tasorentsi, eiro aquemisantajeitime, eiro avavisacojeitajame. Irio jivatiriri maaroni tinaajeitajanchaneri, yanaacojeitaqueru ipincatsaritananoti. Queario ipincatsaritananoti catsini, <sup>19</sup> itasorentsitasanotaque catsini: irootaque icoacaqueriri iriri. <sup>20</sup> Peerani aquisajeiveitarini Tasorentsi, iro cantaincha icamimentajeitaquee Quirishito

coroshiqui, yaparajatimentaqueeero iriraja. Yoameetsajeitaquee, meeca aneacameetsajeitajiri Tasorensi, aisati inecameetsajeitaquee arori. Aisati inquiresati, inecameetsajeitiri Tasorensi; aisati iriori, inecameetsatiri. Ari imataquero Quirishito, cameetsa asavicajeitantari maaroni.

### Iquenquetsatacotiri corosashisati.

<sup>21</sup>Ari, peerani te pinquenqueshiretapiniterini Tasorensi, piquisajeiveitarini. Piquenqueshireveitaroni caari cameetsatatsi, aisati pantapiniveitaroni, caari piquenqueshiretantarini Tasorensi. <sup>22</sup>Iro cantaincha yatiritapaaque Jesoquirishito, impoiji icamimentaquempi, yoameetsataquempi, irootaque pineacameetsatantariri Tasorensi, aisati inecameetsatantimpiri iriori. Inequempi picameetsatasanotaque, iquempetacaantaquempi te aneajeroji meeca pantane. Meeca eiro icantajimpitsi: “Ainiro pantane”. <sup>23</sup>Iro cantaincha icoaque ancantaitatitempani anquemisanteri. Aiquero ajatatiye, anquemisantasanotaque. Pamene, ovaraanaca irineane Tasorensi maaroni nampitsipeequi. Ocamantajeitee jaoca ancanteari avavisacotantajeiri. Tempa naro ovaraquerori, nocarajeitaqueri itsipapee ovaraayetaquerori; aisati icamantaquempiro Epajarashi. Pishiretacaro, piotantacari pavisacotaji. Meeca eiro piperaventarotsi.

### Yoametiri Pavoro caari iojeiveitani.

<sup>24</sup>Oshequi iquematsicatacaro Quirishito yoavisacojeitantacariri maaroni quemisantajeitiriri, meeca ishiacantaquee arori ivatsasanori iriori. Aisati narori, noquempetacari: ainiro noquematsicamentaquempiri, noquemisantacantantaquempi, irootaque noquimoshiretantacari. Moncarataca meeca. <sup>25</sup>Icantaquena Tasorensi: “Pamitacojeiteri maaroni piyemisanteririnte, aisati poametasanojeiteri noneane”. <sup>26</sup>Ari meeca noamejeitempiro caari iojeiveitani inampirepee Tasorensi, aisati caari iojeiveitani atiripee. Meeca iotacaajeiteero Tasorensi, aisati iriori maaroni itsipapee quemisantajeitiriri. <sup>27</sup>Icoaque meeca piojeitero oca imajeitaquempi: ocameetsasaranoti catsini. Te avirojei jorio, iro cantaincha quiso yoasanojeitaquempi Quirishito, irootaque piojeitancari cameetsa pisaviquimojeiteri Tasorensi, coajica. <sup>28</sup>Iriotaque Quirishito noquenquetsatacotiri. Nocantajeitiri atiri: “Pantirocari caari cameetsatatsi”. Aisati noametasanojeitiri iriotasanotanteariri Quirishito, irishiretasanotanteariri. Impoiji iriotacojeiteri atiripee, icameetsasaranoti. <sup>29</sup>Irootaque nopomerentsitimentantaquempi, caari noperaventantimpi. Irio Quirishito shintsitacaquenari, itasoncaventaquena nomatantacarori.

**2** <sup>1</sup>Nocaque piojeite nocantani nopomerentsitacoventimpi noquenquetsatacairi Tasorensi: nocantapinitiri iramitacotempi,

aisati noquempeta Coventiri yora ayemisantaririnte anta Araoriseaqui. Aisati iriori nopomerentsitacoventajeitiri maaroni caari neana. Nocantapinitiri Tasorentsi iramitacotempi <sup>2</sup> piveshireajeitantajeari, pinintavacaajeitantajeari. Aisati nocoaque ontimimotasanotempi piotanteari, nocoaque piotasanoteri yora imanaqueniri Tasorentsi. Meeca iotacaajeitimpi: piojeitiri, iriotaque Quirishito. <sup>3</sup> Iotasanoti catsini, otimasanoti catsini iotantari. Te amateroji anquenqueshiretero maaroni iotiri irinti.

**Icantiri Pavoro: “Yamataviyeetimpicari”.**

<sup>4</sup>Queariompia, yamataviyeetimpicari: irootaque noamejeitantimpirori maaroni oca. <sup>5</sup>Queario, te nontsipajeitimpiji, iro cantaincha oshequi noquenqueshiretaquempi. Noveshireimentaquempi: cameetsa pisavicajeiti, aisati piquemisantasanojeitaque. <sup>6</sup>Tempa peerani pishiretacari Avincatsarite Jesoquirishito, irootaque yoavisacotantaquempiri. Irosati pincanteani: pishireteari maaroni quitaiteriqui, paitapeerica panteri. <sup>7</sup>Noshiacantempiro: ora panquirentsi, irootaque ovaritsa shiocacairori, aisati irootaque shintsitacairori. Aisati pinquempeteari avirori, quiso poyeri Quirishito iriotacantempiri, aisati irishintsitacantempiri. Pincantaitiyempani pinquemisantasanoteri, tempa irootaque yoameyeetimpiri. Aitaque pincantajeiteari, pimpasonquijeiteri Quirishito, tempa icavintsaasanojeitaquee.

<sup>8</sup>Queariompia: eiro piquemisantiritsi yora coavetachari iramatavijeitimpi. Iroamejeitimpime atiripee maaroni iquenqueshireyetiri, aisati maaroni ioyevetari: oca yoameyevetariri ishanincani iriori, intasanotacarori itimi, iro cantaincha te ontampaticateji. Yamatavitimpicari. Te incoacayempiji iriori pinquemisantero yoametimpiri Quirishito.

<sup>9</sup>Peerani iquempetaquee Quirishito avatsa arori, iro cantaincha itasorentsisanotaque catsini, yashi yoiro. <sup>10</sup>Ariorica quiso poyeri, intasoncaventapinijeitimpi, incantaitiyempani, eiro pashinoncantajatsi catsini. Ipincatsaritanotaque catsini, yanaacotasanojeitiri maaroni itsipapee pincatsarivetachari. <sup>11</sup>Yora joriopee, itoyeantajeita: vojocaquero imeshina. Meeca oquempvetaca pitoyeantaca avirori, iro cantaincha yojocacaaquempiro Quirishito caari cameetsatatsi pantiniri. Meeca eiro acoirotsi antapinitero caari cameetsatatsi: tempa ipashinitacaajeitaquee. <sup>12</sup>Ariorica pivaotisajeitaca, oquempetaca pitsipatacari Jesoshi: picamajeitaque, aisati pitijajeitaca. Tecatsi pincanero pincoayetero pantero caari cameetsatatsi: tempa oquempetaca picamaque. Itinaanaja aisati Quirishito, meeca oquempetaca pitinaajeitanaja aisati: meeca pinashijeitaja. Iro pinashijeitantajari, pishiretacari yora Tasorentsisanori: yora oitinaajiriri Quirishito. <sup>13</sup>Peerani oquempetimojeitaquempi picamaque, te pinquenqueshireterini Tasorentsi,

irointi pantapiniveitaroni caari cameetsatsi. Te pioveitearini Tasorentsi. Meecaquea icavintsajeitaquempi: te inquenqueshiretajori aisati caari cameetsatsi pantajeiveitaniri. Meeca piquempetacari Quirishito: piojeitiri Tasorentsi, aisati coajica pisaviquimojeiteri anta inquitequi. <sup>14</sup>Pamene: peerani oshequi apomerentsiventavetaro isanquenareni Moishishi avaviscotantajeameri, iro cantaincha te amoncarajeiteroji. Ayojeitanaque otimini antane, irotaque ajatanteameri ishaaviji. Iro cantaincha icamimentajeitaquee Quirishito coroshiqui, yoavisacojeitaquee. Meeca eiro apomerentsiventirotsi sanquenarentsi avaviscojeitantajeari. <sup>15</sup>Peerani, icamantacari Quirishito coroshiqui, iotacaajeitaquee tecatsi incantajeitee camaari iroashinoncaajeitee. Itsaneacoventaquee, eiro ishinetiritsi camaari irantanatee.

### Eiro piquenqueshiretirotsi yoameyevetimpiri atiripee.

<sup>16</sup>Te oncameetsateji inquisishmentempiro pishaninca poapinitari aisati piraapinitiri. Ainiro quitaiteeripee inashitacaari joriopee, aisati imaoreajeitanti. Irosati yantironi: maaroni osarintsi, maaroni cashiri, aisati maaroni saavaro. Terica pimoncarateari avirori, eiro pishinetiritsi inquisishmentempiro. <sup>17</sup>Peerani icantani yametapinijeitaro joriopee, iquenqueshireantariri Tasorentsi, iro cantaincha meeca yareetaca Quirishito. Iriosanori irinti, ampincatsajeiteri. Moncarataca, ari ocarati: eiro meeca apiitapinitajirotsi yamejeitari joriopee. <sup>18</sup>Queariompia, eiro pishinetiritsi iramatavitempi. Icoacaimpicari pinquempeteari iriori, icantimpicari: “Pimpincatsateri inampire Tasorentsi pavisacotantajeari. Noneaquero caari ineapiniyeeti: ¿pineaquerompa avirori?” Ishemitive. Eiro piquenqueshiretirotsi incantavetempiri, itseevani. <sup>19</sup>Te inquenqueshireteriji yora Jivajeitaqueeri, te irioteriji. Aroquea ainti, ariorica anquenqueshireteri Quirishito, iriotacaajeitee, iramitacojeitee quiso avavacaajeitea, amatasanotantearori icoacaqueeri Tasorentsi.

<sup>20</sup>Icamaque Quirishito, aisati oquempevetaca pitsipatacari picamaque avirori. Meeca eiro piquenqueshiretajirotsi yoameyevetimpiri atiripee: eiro oavisacotimpitsi. ¿Paita patsipetashitantarori pantashiyevetacaro icantimpiri iriori? <sup>21</sup>Icantanivetimp: “Ariorica picoaque poavisacotea, eiro pipamitiritsi yora, eiro poaritsi yora, eiro pantiritsi”. <sup>22</sup>Tempa icantashitacaro atiri oca, yoametashitimpiro. Pamene, tempa ashi airo avapinijeitaro avari: ariorica ayeoro, poyere; tecatsi oncantero ashire. <sup>23</sup>Ariorica antiteari, ajiticari ayoti, ajiticari aquemisantasanoti, ajiticari te ashemete, ajiticari ashinoncaimentacari Tasorentsi. Iro cantaincha atsipetashitacaro atita. Ariorica antitaquea, acantani acoaquero caari cameetsatsi, aisati ashemetaque.

### Icantiri Pavoro: “Cameetsa pisavicajeite”.

**3** <sup>1</sup>Peerani te piojeiveitearini Tasorentsi, pijajeite me Sharincaveniqui; iro cantaincha icamimentajeitaquempi

Quirishito, yoavisacojeitaquempi. Impoiji itinaanaja; irootaque meeca piojeitantariri Tasorentsi, eiro pijajeititsi Sharincaveniqui, ainti pijajeite inquitequi: anta isaviquinta Quirishito iracosanoriqui Tasorentsi, icaratiri ipincatsaritanotaque. Meeca pincoasanotanaque pisavicajeite anta, pintsipajeitantariri. <sup>2</sup>Pinquenqueshirejeitea jaoca pincanteari anta inquitequi, eiro piquenqueshiretapiniyetajirotsi jaoca pincantajeiteari aca quipatsiquica. <sup>3</sup>Oquempetaca picamaque, eiro meeca piquenqueshireyetajirotsi timayetatsiri quipatsiquica, eiro piquempetajatsi peerani. Iro cantaincha yoaneajeitaquempi Tasorentsi, pintimajeitapaaje inquitequi. Iquempoyeaquempi, inquempetacantajempi Quirishito. <sup>4</sup>Coajica impiaje quipatsiquica Quirishito, yora oaneajeitaqueeri. Cameetsa impincatsaritapaaque, ancarajeitapaajeri ampincatsaritapaaje arori.

**Icanti Pavoro: “Eiro papiitajirotsi caari  
cameetsatsi pantaveitaniri peerani”.**

<sup>5</sup>Eiro catsini papiitajirotsi caari cameetsatsi pantaveitaniri peerani. Shirampari, eiro pantirotsi caari pai. Tsinane, eiro pantiritsi caari pai. Eiro pimayempitantapinititsi. Eiro pinevetarotsi tsinane. Eiro pinevetaritsi shirampari. Eiro pinevetasanotarotsi vaararontsi: piquempetacantarocari irio pitasorentsite pinintantarori. <sup>6</sup>Oshequi imayetiro atiripee, irootaque inquisanteariri coajica Tasorentsi. <sup>7</sup>Peerani pantapiniveitaroni, pashi poironi. <sup>8</sup>Pojocajeitajero meeca: eiro piquisavacaajeitajatsi, eiro pitsimajencatavacaajatsi, eiro picatsimatavacaajatsi, eiro picantimatavacaajeitajatsi, eiro pineaveetantajarotsi caari cameetsatsi, <sup>9</sup>eiro pamatavitavacaajeitajatsi. Tempa pinashijeitaja meeca, eiro papiitajirotsi pantaveitaniri. <sup>10</sup>Meeca pimpashinitasanotanaquea, pincameetsatasanojeitanaque, pinquempejeiteari yora Vetsicanaquempiri peerani. <sup>11</sup>Te inquenqueshireteroji Tasorentsi jaocarica acantajeitari: ariorica ajorioti, terica; ariorica atoyeanta, terica. Te inquenqueshireteroji jaocarica aponeacari, paitapeerica ayoyetiri, arorica pimantaari, terica impimanteeteji. Irointi iquenqueshiretacotee aquemisantiririca Quirishito.

**Jaoca icantajeitari quemisantatsiri.**

<sup>12</sup>Pamene, tempa icoyeajeitaquempi Tasorentsi. Icoaque pincameetsatasanotanaque, aisati inintajeitaquempi. Icoacaajeitaquempi pashi poyero pincavintsante, pineshinoncatante. Eiro pishemetitsi, eiro pishema, eiro piquisa. <sup>13</sup>Pintacotavacaayea: eiro pipiataritsi quisavetempineri, irointi pincavintsayeri. Tempa icavintsaimpi Avincatsarite, meeca pishiacoteri, pincavintsajeiteri itsipapee. <sup>14</sup>Jero

oca pimatasanoteri: aiquero pinintavacaasanojeitea catsini, maaroni. Pineaquero, ariorica anintavacaajeitea, ari ancameetsatasanojeitanaque maaroni. <sup>15</sup>Nocoaque piveshireimentajeiteari yora Quirishito. Irootaque icoyeajeitantaquemperi, icoaque piveshireajeitanajea, maaroni. Icoaque anquempetavacaajeitea, maaroni quemisantatsiri. Aisati icoaque ampasonquijeiteri Tasorentsi. <sup>16</sup>Pinquenqueshiretasanotero irineane Quirishito. Pincanteri iriotacaajeitempi cameetsa poametavacaajeitantajeari. Icavintsaajeitaquempi Tasorentsi, meeca pimpasonquijeiteri. Poametavacaajeitea pimpampoyeaventajeiteri. <sup>17</sup>Te ancoajeiteji impashiventacaajeitee Avincatsarite Jesoshi, irootaque nocoacantaquemperi poameetsayetero maaroni pantayeteri. Ocameetsati anquenqueshiretapiniteri, ampasonquijeitanteariri Tasorentsi.

### Icantiri jaoca ancantiriri ashanincapee.

<sup>18</sup>Tsinane, pimpincatsateri pijime, irootaque icoacaquemperi Avincatsarite. <sup>19</sup>Shirampari, pinintasanotero pijina, eiroquea piquishirotsi. <sup>20</sup>Jananequi, pinquemisantapiniteri ashjeitimpiri, paitapeerica incantempiri. Irootaque iveshireimentari Avincatsarite. <sup>21</sup>Itimirica pitomipee, eiro piquisatsatiritsi: pishemashireacaaricari. <sup>22</sup>Pimantaari, pinquemisantasanotero yora amanantimpiri, paitapeerica incantempiri. Eiroquea pamatavitiritsi: eiorica yamenimpitsi, iro cantaincha eiro piperatarotsi pintsameeteneri. Ariorica pipincatsatiri Avincatsarite, ari pishintsiventeneri pivatorote. <sup>23</sup>Paitapeerica panteneriri, pishintsiventeneri. Pinquempetacanteri pishintsiventiniri Avincatsarite, te irio atiri. <sup>24</sup>Piotasanotaque pantapinitaqueneri Avincatsarite Quirishito, iriotaque pinatempineri coajica, iroaneasanotajempi anta inquitequi. <sup>25</sup>Irintiquea yora antapinitirori caari cameetsatatsi: iroashinoncayeri irinti. Paitapeerica antajeitaqueri, timatsi incanteeri arori, tecatsi ancantea amataviteri.

### Icantiri Pavoro: “Pinquenquetsatacapiniteri Tasorentsi”.

**4** <sup>1</sup>Itimirica atiri pamanantiri, cameetsa pineshinoncateri, pincavintsayeri. Tempa pioti itimi anta inquitequi pivincatsarite avirori: iotaque maaroni pantajeitaqueri. <sup>2</sup>Pincantaitatitempani pinquenquetsatacapiniteri Tasorentsi, pimatasanotero catsini. Queario, ariorica pinquenquetsatacayeri, pimpasonquitapiniteri aisati. <sup>3</sup>Tempa nocamantapinitiri atiripee jaoca incanteari iravisacotantajeari, irootaque yoiminqueanteetaquenari meeca caravosoquica. Aisati pincanteri Tasorentsi iramitacotena noncamantajeiteri atiripee jaoca icantajeitaqueeri Quirishito yoavisacotantajeeri. <sup>4</sup>Nocoaque cameetsa nontsoteeneri, inquemasanotantearori. <sup>5</sup>Aisati avirori, ariorica pincarajeiteri caari quemisantayetatsi, cameetsa pisavique,

aisati cameetsa poamejeiteri, eiro piperaventarotsi. <sup>6</sup> Ariorica pinquenquetsacayeri, pincavintsayeri. Eiro pashereiritsi: vero, vero, vero. Ariorica irisampitempi paitarica, piote cameetsa panqueri incoanteari iriori inquemisante.

#### Iquenquetsacotiri Tiquico.

<sup>7,8</sup> Meeca nontianquempiri Tiquico, ayemisantaririnte nonintasanotiri. Iquempejeitaquena, iquearioventiniri Avincatsarite paitapeerica yantiniriri. Incamantapaaquempi jaoca nocantacari nosavicaque. Irootaque nontiancanteariri, piotanteari jaoca nocantajeitari aca. Aisati nocoaque iriveshireacayempi. <sup>9</sup> Intsipatanaqueari Tiquico pishaninca Oneshimo. Irisati iriori ayemisantaririnte, iquearioventiniri Avincatsarite paitapeerica yantiniriri. Nonintasanotiri. Ari incarate apite camantapeempineri maaroni nantajeitiri aca.

#### Ivetsajeitari corosashisati.

<sup>10</sup> Ainiro aca yoiminqueetaqueri aisati yora Arishitaraco, ivetsajeitaquempi. Aisati ivetsajeitaquempi Maricoshi, yora iraniri Verenave. Tempa nocamantaquempi chapinqui: ariorica irareetempi Maricoshi, pineshinoncatavaqueri. <sup>11</sup> Jeri aisati Jesoshi, yora pajitachari aisati Joshito, ivetsataquempi. Jorio inajeiti, iro cantaincha icarajeitaquena noquenquetsatacojeitiri Tasorentsi, jaoca icanta ipincatsariventaquee. Aisati oshequi iveshireacaquena. <sup>12</sup> Ainiro aisati pishaninca Epajarashi, ivetsajeitaquempi. Irisati iriori antaveetiniriri Jesoquirishito. Icantani icantapinitiri Tasorentsi iramitacotempi pincameetsatanteari, aisati pimatantearori maaroni icoacaajeitaquempiri Tasorentsi. <sup>13</sup> Noncamantempi: queario, ipomerentsiventasanojeitaquem pi. Aisati ipomerentsiventiri yora araoriseasati, jeri aisati iyeraporishisati. <sup>14</sup> Aisati ivetsajeitaquempi Irocashi: yora aavintantatsiri nonintasanotiri. Aisati ivetsajeitaquempi yora Temashi.

<sup>15</sup> Novetsajeitari maaroni ayemisantaririnte anta Araoriseaqui, aisati novetsataro Ninaja, aisati novetsajeitari maaroni quemisantapinijeitatsiri anta ovancoqui. <sup>16</sup> Pineanajeiteneri nosanquenare maaroni quemisantatsiri aviroriqui. Impoiji pincanteri yora araoriseasati irineanatenneri maaroni iyemisantaririnte iriori. Aisati pineanajeitero ora nosanquenajeitiniriri iriori. <sup>17</sup> Jero oca pincanteriri Ariquipo: “Pimamatero maaroni icoacaquempiri Avincatsarite”.

<sup>18</sup> Ainirona nosaviqui aca caravosoqui, eiro pipeacotanatsi. Nocoaque irineshinoncajeitempi Tasorentsi.

Ari ocarati. Narotaque sanquenajeitimpirori: *Pavoro*